

Listovi...

"Listao":
Omer HAMZIĆ

**Listovi gračaničkog
kalendara od 8.5. do 1.11.
1999.**

9.5.1999.

Stanari u "državnim" stanovima
rekorderi neplaćanja komunalija

Od ukupnog iznosa dugovanja svih domaćinstava Gračanice, više od 30% duguju stanari gračaničkih stambenih naselja Luke, Grades, Bazen, Kifla, Hadžistevići, Malta - kojih je manje od 10% od ukupnog broja domaćinstava u ovom gradu. Kad su "vodovodadžije" zbog neplaćanja u jednom od tih naselja nedavno "presjekle pipu" (radi opomene), alarmirani su najviši opštinski dužnosnici, potegnuta su ljudska prava i visoka politika... pa je voda opet potekla. "Sve je isto ko i pre" - pa i "blagodeti" socijalizma kao prelaznog društvenog sistema ka komunizmu.

10.5.1999.

Privatizacija "došla" na vrata

Ustvari dolaze poštari i na kućne adrese, to jest građanima "na noge", donose izvode iz jedinstvenih računa građana na kojima "crno po bijelom" piše koliko je ko dobio u miraz od svoje privatizovane države "na papiru". U stvarnosti, vidjet ćemo. Za sada građani svojoj državi (valjda je i pošta to) izvod plaćaju po 3 KM "za komad". Sitnica, za "bogatstvo" koje dobijamo - takoreći "džabe".

14.5.1999.

Izložba slika "Historija iluzija" - Omerović "osvaja" Sarajevo

Sarajevskoj likovnoj publici ovaj gračanički slikar predstavio se sa 45 slika i crteža svog bogatog likovnog opusa i izraza koje je izložio u prekrasnom ambijentu Kuršumli medrese. Nije slučajno što je svoju dvadesetu samostalnu (jubilarnu) izložbu "postavio" upravo u Sarajevu – gradu svoga likovnog školovanja i odrastanja. U tom ambijentu možda je lakše shvatiti njegovu historiju iluzija ili smisao priču o umjetniku u provinciji... Na njegovim platnima prepoznajemo Bosnu u pamćenju i sjećanju, u željama i iluzijama, u "maglama i mjesečinama".

Napomena 1: Nijaz Omerović odnedavno je postao član Udruženja likovnih umjetnika BiH iako mu se to trebalo "dogoditi" mnogo ranije. Napomena 2: Bolje ikad, nego nikad.

20.5.1999.

"Puko" Dudić

Ustvari "proradilo je" veliko klizište "na strani" iznad gračaničke mahale Dudić koje je direktno ugrozilo četiri kuće (dvije su već iseljene), a indirektno zaprijetilo čitavoj mahali i mnogobrojnim kućama iza gračaničke pijace. Ogromno brdo "krenulo je prema čaršiji" tokom minulih kišnih dana, i ukoliko bi se nastavilo "klizanje", sve skupa moglo bi moglo otići dodavola. Angažovani su vrhunski stručnjaci sa Rudarsko-geološkog fakulteta iz Tuzle koji će ispitati uzroke i predložiti mjere za zaustavljanje stihije, a traži se pomoć i od Kantonalne vlade. Oni koji su već ostali bez svojih kuća (porodice Dželilović i Nurić) tvrde da je "os-

jelina krenula" zbog enormnog potkopavanja u podnožju brda za gradnju nekoliko kuća. Prema prvim procjenama, za sanaciju klizišta trebat će velike pare - od 500 hiljada do milion maraka. Stručnjaci će reći svoje, a ko će dati pare za sanaciju, ne zna se još.

21.5.1999.

"Gračanički glasnik" – sedmica u znaku Hajrije Bećirovića

Sedmi broj časopisa promovisao je Atif Kujundžić, književnik iz Lukavca, koji je, osvrnuvši se na prethodnih šest brojeva, pohvalio čitav ovaj izdavački projekat, njegove protagoniste i saradnike, te podsjetio na poznatu mudrost Mula Mustafa Ševki Bašeskije: "Što je zapisano – ostaje. Što se pamti – iščezne". O poeziji Hajrije Bećirovića govorio je Mirzet Hamzić, profesor iz Sarajeva.

22.5.1999.

Promovisna "Crvena rupa" Zlatka Dukića

O knjizi su na promociji u Gračanići govorili Reuf Sokolović, Omer Hamzić i prof.dr. Mustafa Šehović kao promotor.

To je osmi roman ovog tuzlanskog književnika i publiciste, donedavno predsjednika Kantonalnog odbora SDP, koji na vrlo intrigantan način, sa prepoznatljivim protagonistima i likovima, detaljno opisuje svoju posljednju fazu predsjednikovanja i vjerovatno kraj svog političkog angažmana u Tuzli. Knjiga nije samo političko štivo, ona se bavi univerzalnim sukobom pojedinca i kolektiva, pojedinca i vlasti, moćnika i podanika, to-

talitarnog i demokratskog – na način i prema iskustvu autora, koji je dio toga "prošao uživo".


25.5.1999.

**Dan opštine Gračanica –
svečano i radno**

Osim bogatog kulturno-umjetničkog programa (promocije knjiga, nastup KUD-a "Adem Alić", cjelovečernji programi učenika Mješovite srednje i Prve osnovne škole, zabavni program u centru grada) i višednevnih sportskih aktivnosti (rukometni turnir, atletske trke učenika, košarkaške i fudbalske utakmice) među kojima je posebnu pažnju privukla Prva brdska autotrka šampionata BiH "Gračanica 99", povodom Dana opštine zvanično je otvoreno i pušteno u rad i nekoliko značajnih objekata: Motel "Saks" na magistralnom putu Doboj Tuzla, Poligon za obuku vozača u Kamenolomu Pašalići, Trafostanica kod hotela i Gradski pasaż u centru Gračanice kao jedno od najljepših ur-

banih i arhitektonskih rješenja ovoga grada u posljednjih dvadesetak i više godina.

Na svečanoj akademiji, kojoj su prisustvovali mnogobrojni gosti, među kojima i predstavnici bratskih gradova Padova i Formia iz Italije i Flori-a iz Francuske, načelnik opštine Muhamed Ibrahimović pročitao je referat iz kojeg izdvajamo: "Pomenuta historijska vertikala jasno nam pokazuje da su svi oni koji su bili na strani Bosne, uvijek bili na pravoj strani, od najstarijih vremena do današnjeg dana. To potvrđuju i najnoviji događaji iz našeg neposrednog okruženja. Ovih dana možda prisustvujemo drami slamanja posljednjeg uporišta fašizma u Evropi koja se odigrava iza naših istočnih granica. Možda tek sada postajemo svjesni kakvom smo i koliko smo zlu stali na put i kakvoj smo se pogubnoj opasnosti izložili u proljeće 1992. godine, pa i tog 25. maja – i ne radujemo se što nam "komšiluk gori" – iako znamo i pamtimo šta nas je sve sustizalo iz tog komšiluka kako



u daljoj prošlosti, tako i u periodu od 1992. do 1995. godine, iako znamo šta nam i danas te iste komšije priželjkiju i misle.”

25.5.1999.

Dan opštine Gračanica - dobitnici opštinskih priznanja

a) Zlatna plaketa: Čolić Liliane i Dino, DD "Jadrina", Malonogometni klub "Kaskada"; **b) Srebrna plaketa:** DJL "Eurogalant", Druga osnovna škola, Lovačko društvo "Srndać"; **c) Zlatna značka:** Čamdžić Mirsad, Džinić Abdurahman, Helić Safet, Kadić Sead, Salihbašić Šehzada, Zelenurović Suad; **d) Srebrna značka:** Aljić Adem, DJL "Cicerprom", Džindo Ševal, Jahić Mirsda, Omerašević Omer, Pašalić Mustafa, Savjet Mjesne zajednice G. Orahovica, Šabić Melika; **e) pismena pohvala:** Trepanić Muris, Bajrić Izet, Popović Zdenko, Junuzović Mustafa, Rašić Jozo, Drugi inženjerski bataljon Drugog korpusa Vojske Federacije BiH, Luciano Naressi, Mchinbašić Emin, Nurić Jusuf, Žunić Ibrahim.

27.5.1999.

Uspješna "Naša djeca"

To je u najkraćem ocjena rada Dječjeg obdaništa koju je dalo Opštinsko vijeće prilikom razmatranja godišnjeg izvještaja ove gračaničke javne ustanove. Osnovano je 1975. godine (tada pod nazivom "Mirko Garić") kao ustanova za odgoj i obrazovanje predškolske djece, uzrasta od 2 - 7 godina i do sada brojne generacije malih Gračanlija uspješno izvela "do škole". Danas radi u tri objekta - centralnom, u naselju Luke i naselju Grades - ima 142 "đaka" o kojima brine 10

vaspitača, jedna medicinska sestra i 8 ostalih - pomoćnih i rukovodnih radnika. U finansiranju redovne djelatnosti ove ustanove, pored roditelja, značajno je učestvovala Opština i Soroš fondacija kroz projekat "Korak po korak". U narednom periodu funkciju "glavnih finansijera" vjerovatno će preuzimati roditelji ... korak po korak - sve je u tranziciji...

28.5.1999.

Udruženje peradara - biti ili ne biti

Stanje u peradarskoj proizvodnji i proizvodnji hrane uopšte odraz je bijede i besmisla ekonomske politike ove zemlje. Domaći krompir se baca, domaće mlijeko teče potocima, jednodnevni pilići u "Kokaproduktu" se spaljuju - a gladnih usta na pretek...

"Zbog nefunkcionisanja države, nelegalnog uvoza dokazano lošeg kvaliteta koji se odvija u sprezi trgovačke mafije i vladajuće strukture - mi proizvođači pilećeg mesa dovedeni smo u dramatičnu situaciju", rekao je Reuf Sokolović na konstituirajućoj sjednici Skupštine Udruženja peradara Tuzlanskog kantona sa sjedištem u Gračanici, prihvatajući se funkcije predsjednika ovog Udruženja.

Sokolović je prvi direktor "Kokaprodukta", utemeljitelj peradarstva u Gračanici - prije 20 i više godina. Zna svaki "damar" ove osjetljive proizvodnje i tvrdi da nikad nije bilo teže. Bolje "kadrovsko rješenje" za svog predsjednika peradari nisu mogli naći. Stoga s pravom očekuju da će u okviru Udruženja lakše rješavati svoje probleme, ali boriti se i protiv vlastitih slabosti. Krenulo se dosta ambiciozno - od zajedničkog nastu-

panja na tržištu, pa do različitih vido-va pritisaka na one koji "vladaju" – kako bi nam se napokon "desila" država.

3.6.1999.

**Dom zdravlja Gračanica –
kontinuirano snabdijevanje
vodom**

Izgradnjom i puštanjem u upotrebu rezervoara za kontinuirano snabdijevanje vodom ova zdravstvena ustanova ispunjava još jedan uslov za sticanje statusa opšte bolnice. Izgradnju rezervoara pomogla je humanitarna organizacija "Hjumen Rilif Interencšenel" donacijom u iznosu od 22.000 DM - hair vrijedan svakog poštovanja.

5.6.1999.

**Svjetski Dan ekologije "obilježen"
novim trovanjem Spreče**

Ispuštanjem većih količina otrovnih materija "od strane nepoznatih zagađivača" uzvodno od Gračanice i ko zna kojim po redu trovanjem riba u Spreči na najbolji način "obilježen" je Svjetski dan ekologije uz ovu ukletu rijeku, koja tiho umire - dok ljudi pored nje žive čute ko ribe.

11.6.1999.

Nato na Kosovu

Nakon 77 ili 78 dana Nato udara po Miloševićевой Srbiji – velikih zločina po Kosovu i egzodusa blizu milion Šiptara - "srpska nepobediva armada" napokon je natjerana da se "podvita repa" povuče sa Kosova. Tako je završen boj na Kosovu, srpska vojska i policija u dugim kolonama napušta ovu pokrajinu pod pritiskom jačeg i slavi još jednu istorijsku "pobedu".

Ova vijest je i u Gračanici kao i u drugim dijelovima Bosne dočeka bez neke euforije i trijumfalizma. Jedino ima žaljenja što do ovoga nije došlo ranije. Ne bi bilo tolikih žrtava, patnji, stradanja, razaranja, zla i mržnje...

17.6.1999.

**Prva aukcija - početak
privatizacije u Gračanici (male)**

Kantonalna agencija za privatizaciju ponudila je na prodaju 16 predmeta aukcije gračaničkih preduzeća "Bosna" (poslovni prostori) i "Graplast" (mašine). Od 16 prijavljenih, uslove za prodaju ispunjavala su samo dva predmeta. Riječ je o "Bosninom" nedovršenom poslovnom prostoru broj 42 i prodavnicu mješovite robe broj 107 u Džakulama. Nedovršeni poslovni prostor kupio je Džemal Alić (44.100 KM), a prodavnicu mješovite robe Esad Hatunić. (65.000 KM). Počelo je počelo...

18.6.1999.

Novi gimnazijski list "Gim"

To je naziv Školskog lista Gimnazije "Dr. Mustafa Kamarić" koji je u svom punom sjaju ugledao svjetlo dana na kraju ove školske godine kao povremeno glasilo – prvo nakon 38 godina kada je u toj školi, kako piše u Uvodniku, izlazio list "Glas gimnazijalca". List obiluje aktuelnim temama koje zaokupljaju mlade, temama iz svakodnevnog života škole, zabavnim rubrikama, đlačkom poezijom... I po nekim strožijim kriterijima, svi ti tekstovi zaslužuju visoke ocjene. Što se tiče tehničkog uređenja, tu je bez sumnje – čista petica.

20.6.1999.

Flori Lezobre – Gračanica:
učvršćene prijateljske veze

To je bilans desetodnevne posjete zvanične delegacije opštine Gračanica na čelu sa Muhamedom Ibrahimovićem, načelnikom opštine Gračanica bratskom francuskom gradu Floriju. Uz zvaničnu delegaciju, brojnu gračaničku ekipu u Floriju činili su i članovi Kulturno-umjetničkog društva "Adem Alić", muzička grupa "Boja noći" i Nogometni klub "Gračanica-Grin", koji su imali priliku da se predstave francuskim prijateljima. U nezaboravnoj uspomeni ostat će im kulturno-zabavna priredba "Bosanska noć", ceremonija otvaranja "Gračaničkog parka" u prijateljskom Floriju, posjeta Parlamentu Francuske, razgledanje kulturno-historijskih znamenitosti, posjeta nekim tvornicama u okolini Florija itd. Sljedeći korak je uspostavljanje i jačanje pivredne saradnje između ova dva bratska grada.

25.6.1999.

Otvorena fabrika za proizvodnju
betonskih centrifugalnih stubova
u D. Lohinji

Skoro u rekordnom roku fabriku su izgradile privatne firme "Tehna" iz Gračanice i "Zagorje-tehnobeton" iz Varaždina kao zajedničko ulaganje u iznosu od 1,5 DM.

Posao je dobilo 36 radnika koji će raditi u dvije smjene i proizvoditi 32 betonska stuba dnevno. Plasman je obezbijeden na domaćem i hrvatskom tržištu, pretežno za potrebe elektroprivrede, a planira se izlazak i na tržište SR Jugoslavije. Privredni potez za ugled.

25.6.1999.

U Srebrnik preko Orahovice -
asfaltom

Riječ je o dionici regionalnog puta Gornja Orahovica – Falešići – Čekanići u dužini od desetak kilometara koja je, nakon rekonstrukcije i asfaltiranja, zvanično puštena u saobraćaj. U ovaj posao Kantonalna direkcija za puteve uložila je oko 1,7 miliona KM. Time je označen početak novog kvalitetnijeg življenja u naseljima pored tog puta - koji predstavlja drugi, alternativni saobraćajni spoj između opština Gračanica i Srebrenik.

28.6.1999.

Novi koraci u razvoju stočarstva
na opštini

Na osnovu programa Federalnog ministarstva za poljoprivredu, vodoprivredu i šumarstvo i IFADA, zainteresovanim poljoprivrednicima na području opštine pod relativno povoljnim kreditnim uslovima dodijeljeno je 185 visokomljičasnih junica simentalske pasmine. Program kreditira Međunarodni fond za razvoj poljoprivrede – na četiri godine, uz grejs period godina dana. Ovaj aranžman odobren je opštini Gračanica zato što su dosadašnji korisnici kredita iz ove linije bili urednije "vratiše" u odnosu na ostale opštine. Sljedeći puta mogli bi dobivati kredite na obraz.

22.7.1999.

"Samit" o stabilizaciji životnih
prilika u donjem toku Spreče i
oko Doboja

To je ustvari Okrugli sto (održan u svečanoj sali "Olimpa") za kojim su se po prvi puta našli "licem u lice"

načelnici, odnosno predsjednici 6 opština s jedne i s druge strane međuentitetske linije: Doboj, Doboj Jug, Doboj Istok, Gračanica, Lukavac i Petrovo. Uz pomoć predstavnika međunarodne zajednice, domaćin skupa bio je načelnik opštine Gračanica Muhamed Ibrahimović, koji se potrudio da sve prođe u najboljem redu i "kako valja". Razgovaralo se o povratku manjina, ekonomskoj saradnji, razmjeni dokumentacije i slobodi kretanja. Potpisana je zajednička izjava u kojoj se izražava spremnost i dobra volja za ozbiljnije iskorake u pravcu normalizacije života na ovom prostoru. Ali prije toga valja riješiti mnoge probleme na višem nivou – konstatovali su gotovo svi učesnici ovog skupa, kojima se ti problemi najviše i "obijaju" o glavu.

23.7.1999.

Pušten u saobraćaj karanovački most

Oko tog mosta u proljeće 1992. godine desili su prvi incidenti i nagovijestili rat. Tu je presječen magistralni put Doboj-Tuzla kao i svako komuniciranje između Ozrena i Gračanice. Nekad su ga zvali most bratstva-jedinstva, početkom rata most mržnje i zla. Tu je bio spoj između Karanovca s lijeve i Lendića s desne strane Spreče. Lendići su bili strateško srpsko uporište koje se protezalo sve do Malešića i ugrožavalo skoro pola opštine Gračanica. Most je srušen u avgustu 1992 godine nakon pada Lendića pod kontrolu Armije BiH... Mnogo je vode od tada proteklo Sprečom... Novi most na istom mjestu, montažni, vojni podigli su vojnici NORD bataljona SFOR-a i uz skromnu svečanost pustili u saobraćaj - da opet

spaja dvije obale Spreče, da opet spaja ljude. Stisak ruke predsjednika opštine Petrovo gospodina Đorđe Ilića i načelnika opštine Gračanica gospodina Muhameda Ibrahimovića na sredini tog mosta više je od simbolike.

15.8.1999.

Otkriven spomenik oslobođiocima Visa

...strateške i najviše kote od Gračanice do Save koju je fortifikacijski utvrđivala JNA mnogo prije nego što će sa nje poletjeti ubitačni projektili na Gračanicu i bošnjačko-muslimanska sela južnog trebavskog pobrđa po kojima "nepobedivi" artiljerci počinili mnoga zla.

Borci 111. gračaničke brigade i još nekih jedinica OG-2 (gračaničke operativne grupe Armije BiH) tu su kotu zauzeli u silovitom jurišu 7. avgusta 1994. godine i tako izvojevali jednu od svojih najznačajnijih pobjeda u minulom ratu za BiH. Otkrivanjem spomenika obilježena je peta godišnjica bitke na Visu i sedma godišnjica 111. (221) gračaničke brigade. Prethodno je održana i svečana akademija na kojoj je o borbenom putu 111. gračaničke govorio njen ratni komandant Tarik Nuhanović. Da se pamti – i ne zaboravi.

21.8.1999.

Otvorena džamija u Prijekom Brdu

...jednom od najudaljenijih sela gračaničke opštine, u kojem se nikada nije čekala pomoć sa strane, već se uvijek "uzdalo u se i u svoje kljuse". I ovu džamiju Prijekovljani izgradiše, ne odstupajući od tog principa. Tako su izgradili i školu, i dom kulture, i put, i

vodu i telefoniju... Gradnja džamije, za koju je zemljište darovao mještанин Galib Taletović, započeta je 1986. a završena 1990. godine, ali je njeno otvaranje zbog ratnih prilika i drugih okolnosti odgađano sve do sada. Veliku radost povodom završetka ove hajirli akcije sa Preijekovljanima su podijelili brojni musafiri, među kojima i reis-ulema dr. Mustafa ef. Cerić, iz čijeg nadanutog govora izdvajamo sljedeću misao: "Moramo se osloboditi onih koji su se umislili i osilili, kao i onih koji nas žele raznim smicalicama okaljati bez povoda, kao što se moramo pričuvati i neukih vjernika jer čine štetu vjeri..." (Preporod, 17/666, 1.9.1999)



31.8.1999.

Sanacija regionalnog puta Gračanica Srnice kroz Gračanicu

...u dužini od 3,5 kilometara trajala je skoro cijelo "dugo toplo ljeto". Poslovična neefikasnost izvođača i tolerantan odnos naručioca i finacijaša radova - Kantonalne direkcije za puteve, nanervirao je Gračanlije - obične građane, ali i aktuelnu lokalnu vlast koja je zbog toga morala i javno protestovati. Inače, radi se o izuzetno značajnom poduhvatu, vrijednom 550.000 maraka, koji bi trebalo pohvaliti, bez obzira što ostale gradske ulice, što se sanacije tiče, ostaju i dalje "na čekanju".

8.9.1999.

Kvalitet garant – "Eurogalant"

Riječ je o firmi koja se za svega tri do četiri poslijeratne godine razvila u renomiranog proizvođača kožne galanterije, stopostotnog izvoznika, sa 73 zaposlena radnika koji imaju pune ruke posla... Počelo se skromno, u neuslovnim prostorijama, sa svega nekoliko starih mašina i nekoliko radnika koje je oko sebe okupio mladi i ambiciozni inženjer Senahid Smajlović, osnivač i vlasnik firme. Danas se već pripremaju za početak izgradnju vlastite hale u kojoj će posao dobiti još pedesetak radnika. Pravo osvježenje na privrednoj sceni Gračanice.

24.9.1999.

Jubilarni 20. Kikićevi susreti u Gradačcu

...i ove godine privukli su brojne poslenike pisane riječi i poštovaoce Kikićevog književnog djela koji su došli u pohode gradu Zmaja od Bosne u želji da uveličaju jednu od najstarijih

kulturnih i književnih manifestacija u ovom kraju. To što ih na zvaničnom otvaranju nisu pozdravili čelnici ovdašnje aktuelne vlasti (valjda kao domaćini) više govori o toj vlasti nego o ovoj manifestaciji.

Posebnu pažnju na ovoj manifestaciji privuklo je izlaganje prof. dr. Hanife Kapidžić-Osmanagić na temu "Žena u književnom djelu Hasana Kikića". Nastupili su i naši poznati književnici: Izet Sarajlić, Ismet Bekrić, Velimir Milošević, Šimo Ešić, Jasmin Imamović, Ibrahim Kajan, Almir Zalihić, Amir Suljević i drugi. Dodijeljena je godišnja nagrada Izdavačke kuće "Bosanska riječ" iz Wupertala autoru Almiru Zalihiću za "Antologiju savremene književnosti Bošnjaka Sandžaka", a promovisan je i zbornik radova o Hasanu Kikiću pod naslovom "Dobrota bivanja", koji je priredio doajen ovih susreta Sadik Šehić.

Život i djelo Hasana Kikića umnogome je vezano i za područje Gračanice. Jesu li to znali oni koji su prije nekoliko godina "skinuli" njegovo ime sa najveće osnovne škole u Gračanici? Kikićevo književno djelo, srećom, nadživjelo je i bolje i gore od nas. Dobrota bivanja je neprolazna.

25.9.1999.

Gračanički privrednici – pomoć povratnicima u Republiku Srpsku

Prikupili su oko 500 tona građevinskog materijala i konvojem od 50 kamiona uputili povratnicima u Doboj, Modriču i Vukosavlje, odnosno Svjetliču, Grapsku, Sjeninu Rijeku - te na najbolji način pokazali kako se provodi u život Aneks 7 Dejtonskog mirovnog sporazuma. U pravo vrijeme na pravo mjesto.

1.10.1999.

Optički kabl Tuzla-Sarajevo - telefonija za 21. stoljeće

Puštanjem u rad optičkog kabla između Tuzle i Sarajeva, aktivirana je i savremena telefonska centrala u Banovićima (10.000 brojeva), te tri takozvane čvorne telefonske centrale: Lukavac sa 5.600, Kalesija sa 6.300 i Gračanica sa 2.500 brojeva. To je investicija od 6,5 miliona KM, od kojih su, prema pisanju "Oslobodjenja", 3,7 miliona obezbijedili sami poštari (Javno preduzeće PTT BiH). Poslije Zenice i Mostara, Tuzla je treći grad u BiH, povezan optičkim kablom sa Sarajevom (u dužini od 145 kilometara) koji obezbjeđuje brzi prenos slike i tona i približno 8.000 telefonskih kanala. Radi se o najsavremenijoj tehnologiji za razmjenu različitih signala sa svijetom - od zvuka i slike, do interneta.

2.10.1999.

Otvorena nova četvororazredna osnovna škola u Škahovici

Sredstva za izgradnju škole, njeno opremanje, učila i namještaj obezbijedile su humanitarne organizacije iz Italije (volonteri grada Padove 110.000 DM) i Engleske (54.000 DM), opština Gračanica (22.000 DM), a mještina zajednica Škahovica lokaciju. Otvaranje škole obavljeno je u prisustvu brojnih gostiju iz inostranstva, Tuzle i Gračanice.

Školu je otvorio ministar obrazovanja, nauke, kulture i sporta u Vladi Tuzlanskog kantona Ismet Osmanović. Svojim prisustvom domaćine je posebno počastila gospođa Lučija Zanarella iz Padove, veliki i dokazani prijatelj Gračanice.

5.10.1999.**"Vega fruit" – korak u Evropu**

Ovoj renomiranoj fabrici iz Male Brijesnice (koja je za vrijeme agresije na BiH "krenula" bukvalno sa ledine i, zahvaljujući nekolicini stručnjaka-muhadžira iz bivše dobojske "Bosanke", postala "čudo ekonomskog otpora" bošnjačkog naroda) dodijeljen je certifikat "ISSO 9001" – prvi u oblasti prehrambene industrije u Bosni i Hercegovini. Radnici i stručnjaci ove tvornice tako su položili još jedan težak ispit. Oni idu dalje...

15.10.1999.**Poklon-knjige za biblioteku "Dr. Mustafa Kamarić"**

...stižu od mnogih građana koji tako obogaćuju knjižni fond ove najstarije kulturne ustanove u Gračanici. Biblioteka raspolaže sa fondom od oko 50.000 knjiga, ima oko 2.500 aktivnih čitalaca – pretežno đaka i studenata, koji su za devet mjeseci ove godine pročitati oko 22.000 knjiga...

Iako za svaku pohvalu, akcija poklon-knjiga neće nadomjestiti ono što treba da urade takozvani odgovorni faktori za koje je knjiga i kultura stvar besposlice, dangube i nepotrebnog troška ...nažalost.

16. 10.1999.**Dobar start privatizacije u Gračanici**

Ukratko, do sada su privatizovana četiri preduzeća i devet poslovnih prostora DD "Bosna". Prodajno skladište DD "Distributivni centar" u Gračanici kupila je privatna firma "Tržni centar" (vlasnik Mehmed Duraković). U cjelini ili putem tendera, kako piše Hasan Čalić u "Dnevnom avazu", prodana su sljedeća preduzeća: DD "Stočar" (kupac Safet

Dedić), DD "Transport i mehanizacija" (kupac Sajid Nurkić u ime 31 radnika preduzeća), DD "Zanati" (kupac DJL "Džambo") i DD "Avis" (kupac većinskog dijela od 52% DJL "Saks"). "Tranzicija" se polahko zahuktava, sve brže prelazimo iz jedne u drugu epohu – sa puno nostalgije, straha i neizvjesnosti podvlačimo crtu ispod nečega što se zvalo socijalizam, samoupravljanje i – tome slično.

25.10.1999.**Prva osnovna i Mješovita srednja škola najbolje na TK**

Ovo je saopšteno iz Pedagoškog zavoda u Tuzli, koji je izvršio vrednovanje rezultata ostvarenih u nastavi i vannastavnim aktivnostima u svim školama na Kantonu. To je veliko priznanje za 1570 učenika Prve osnovne i za 1842 učenika Mješovite srednje škole, a posebno za njihove nastavnike i profesore koji su zasluženno zaradili "čistu peticu". I gračanička gimnazija "Dr. Mustafa kamarić" osvojila je vrlodobro četvrto mjesto.

30.10.1999.**"Stanogradnja" – školski primjer Mješovite srednje škole u Gračanici**

Ne čekajući da mu problem nedostatka deficitarnih kadrova u nastavi rješavaju "odgovorni faktori sa strane", nastavnici i učenici ove škole na čelu sa svojim direktorom Seadom Korjenićem, upustili su se u jedinstven posao u ovoj branši. Nadogradnjom postojećeg školskog objekta, uglavnom vlastitim sredstvima i radom podigli su 6 stanova i dodijelili ih takozvanim "deficitarcima". Ukupna stambena površina oko 450 kvadratnih metara, vrijednost investicije – blizu 200.000 KM. Od inicijative do realizacije – "zarađena" čista petica.